



Arkivnr: 2014/2-66  
Saksbehandlar: Adeline Berntsen Landro

## Saksframlegg

### Saksgang

Utval	Saknr.	Møtedato
Hordaland fagskulestyre		27.01.2015
Fylkesutvalet		18.02.2015
Fylkestinget		10.03.2015

## Endring av styrevedtekter for Fagskolane i Hordaland

### Samandrag

I sak PS 77/2014 vart det varsla endringar i styringssystemet for fagskulane på bakgrunn av ein gjennomgang av gjeldande lovverk og fylkeskommunen sitt fullmakts- og delegasjonsreglement. I saka vart det blant anna vedtatt at det blir utarbeidd ei sak til fylkestinget med forslag om endringar av vedtektene for Hordaland fagskulestyre i tråd med fagskulelova. I denne saka følgjer forslag til endringar i styrevedtektene for Hordaland fagskulestyre.

### Forslag til innstilling

Fylkestinget vedtek endringar i styrevedtektene for Hordaland fagskulestyre som det går fram av denne saka.

Rune Haugsdal  
fylkesrådmann

Svein Heggheim  
fylkesdirektør opplæring

*Saksframlegget er godkjent elektronisk og har derfor inga underskrift.*

### Vedlegg

1 Forslag til nye styrevedtekter for Hordaland fagskulestyre

## Fylkesrådmannen, 07.01.2015

I sak PS 77/2014 vart det varsla endringar i styringssystemet for fagskulane på bakgrunn av ein gjennomgang av gjeldande lovverk og fylkeskommunen sitt fullmakts- og delegasjonsreglement. I saka vart det blant anna vedtatt at det blir utarbeidd ei sak til fylkestinget med forslag om endringar av vedtektene for Hordaland fagskulestyre i tråd med fagskulelova. På bakgrunn av dette har administrasjonen gått gjennom styrevedtektene og funne fleire punkt som treng revidering og oppdatering. Følgjande endringar vert føreslått:

### *Punkt 2*

*Styret for fagskulane i Hordaland har sju medlemmer. Fem medlemmer, med to varamedlemmer, blir valde av fylkestinget. Tilsette og studentar har ein representant kvar. Ein representant frå kvart av dei faglege råda har talerett i styret.*

### *Nytt punkt 2*

*Styret for Fagskolane i Hordaland har sju medlemmer. Fem medlemmer, med to varamedlemmer, blir valde av fylkestinget. Tilsette og studentar har ein representant kvar med personleg vara.*

Det kjem ikkje fram av vedtektene i punkt 2 at tilsette og studentar har ein styrerepresentant kvar med personleg vara, og dette er difor lagt til i nytt punkt 2.

Vidare er det føreslått å ta ut: «*Ein representant frå kvart av dei faglege råda har talerett i styret*». Det er per i dag ingen faglege råd som er aktive. Råda skulle vere eit verktøy for styret og fagskulane i høve til god næringskontakt, men det viste seg å vere vanskeleg å oppretthalde aktiviteten til dei faglege råda fordi skulane har mykje kontakt med næringslivet jamt gjennom året, og møte i råda vart såleis overflødige. Fagskulane har i staden utarbeidd samarbeidsavtalar med næringslivet innan aktuelle fagområde. I tillegg vert heilt nye tilbod utvikla i tett samarbeid med næringa.

### *Punkt 3*

*Fylkestinget nemner opp eigarrepresentantane i styret og mellom dei leiar og nestleiar. Tilsette og studentrepresentant med personleg varamedlem blir vald av og mellom dei tilsette og studentane. Eigar- og tilsettere representantane blir valde for to år om gongen og studentrepresentantane for eitt år om gongen.*

### *Nytt punkt 3*

*Fylkestinget nemner opp eigarrepresentantane i styret og mellom dei leiar og nestleiar. Tilsette og studentrepresentant med personleg varamedlem blir vald av og mellom dei tilsette og studentane. Eigarrepresentantane blir valde for fire år, tilsettere representantane blir valde for to år og studentrepresentantane for eitt år om gongen.*

I praksis vert eigarrepresentantane i styret vald for fire år av gongen, og det vert difor føreslått i nytt punkt 3 at eigarrepresentantane vert valde for fire år. Det er praksis at styret vert oppnemnt av Fylkestinget i etterkant av kommune- og fylkestingsvalet.

### *Punkt 5*

*Fylkesrådmannen skal syte for at styret har eit sekretariat.*

### *Nytt punkt 5*

*Fylkesdirektør opplæring er ansvarleg for saksførebuing til styret.*

Fylkesdirektør opplæring har fått delegert ansvaret for sekretariatet for Hordaland fagskulestyre, men dette kjem ikkje fram av fullmakts- og delegasjonsreglementet. Det vert difor føreslått at punkt 5 vert endra til at *Fylkesdirektør opplæring er ansvarleg for saksførebuing til styret.*

*Punkt 6*

*Styret opprettar ei klagenemnd med tre personar frå dei ulike fagmiljøa ved fagskulane. Klagenemnda skal handsama klager på enkeltvedtak for styret. Avgjerd om habilitet etter §§ 6-10 og om teieplikt etter §§ 13-13e i forvaltningslova 10. februar 1967 gjeld for handsaming av saker, jfr. fagskulelova. Avgjerd om opptak, avsluttande vurdering, bortvising, utestenging, utvising og andre disiplinære sanksjoner skal handsamast etter reglane om enkeltvedtak i forvaltningslova.*

*Nytt punkt 6*

*Styret er klageinstans for Fagskolane i Hordaland. Styret kan opprette ei særskild klagenemnd for handsaming av klager. Klagenemnda skal handsama klager på enkeltvedtak. Avgjerd om habilitet etter §§ 6-10 og om teieplikt etter §§ 13-13e i forvaltningslova 10. februar 1967 gjeld for handsaming av saker, jfr. fagskulelova. Avgjerd om opptak, fritak og innpassering, avsluttande vurdering, bortvising, utestenging, utvising og andre disiplinære sanksjonar skal handsamast etter reglane om enkeltvedtak i forvaltningslova.*

NOKUT har peika på at styrevedtektene stadfestar at styret opprettar ei klagenemnd i staden for å konstatere at styret er klageinstans og kan opprette ei særskild klagenemnd om ønskjeleg. Slik punkt 6 står, kan det sjå ut som om eigar instruerer styret til å opprette ei særskild klagenemnd, og det har ikkje eigar kompetanse til i høve fagskulelova. Det vert difor føreslått endringar i punkt 6 som gjer at det kjem fram at styret er ansvarleg for klagehandsaming.

NOKUT har også påpeikt manglar i høve til klage tilgang for søknad om fritak og innpassering av emne. Dette er difor lagt til punkt 6 for å presisere at klagenemnda også handsamar klager på avgjerd om fritak og innpassering av emne.

*Punkt 11*

*Fylkesrådmannen kan instruera styret om at iverksetjing av ei sak skal utsetjast til kompetent politisk organ har handsama saka.*

Det vert føreslått å fjerne punkt 11 frå vedtektene av di det er uklart kva «saker» ein meiner, og om dette er i konflikt med styret sin kompetanse som øvste styringsorgan for Fagskolane i Hordaland.

Utkast til reviderte styrevedtekter for Hordaland fagskulestyre ligg vedlagt.